



# Ալեքսանդր Ճատուրյան

## Ժամանակակից օրորանք

Օ՛ր-օ՛ր-օ՛ր, բալա՛ս, օ՛ր-օ՛ր-օ՛ր, ջանի՛կ,  
Կուզեմ քեզ կյանքում տեսնել երջանի՛կ:

Հերրդ հարուստ էր, հարուստ էլ մեռավ,  
Ո՛ւմ փողերն ասես կյանքում չըկերավ.  
Ժըլատ ու գըծուծ, մարդ չէր մեղքանում,  
Խիղճը փողումն էր, հոգին-գրպասում.  
Գրպանից գոռով կոպեկ հանելիս,  
Հեսն էլ հոգուցն էր մի կտոր տալիս...  
Ողորմի՛ հոգուն... Էդ ճանապարհով  
Քեզ էլ գանձ թողեց ու կյանք ապահով.

Օր-օր-օ՛ր, բալաս, օր-օր-օ՛ր, ջանի՛կ,  
Կուզեմ քեզ կյանքում տեսնել երջանի՛կ...  
Կըվարձեմ դայակ ու դաստիարակ՝  
Մանգել ու մյուսիո, որ ազա՛տ, արա՛գ  
Միտքըդ զարգացնեն, աչքըդ բաց անեն,  
Կյանքի նորանո՛ր ճամփեքով տանեն...  
Փորձ, շիկ ու ճաշակ շատ ունեն նրանք,  
Անմեղ գառի պես, դու կյանք չես մտնիլ.  
Կյանքի համ ու հոտ, գաղտնիքներ բոլոր  
Նըրանք լա՛վ գիտեն... Որդի ջան, օ՛ր-օ՛ր...

Օր-օր-օ՛ր, բալա՛ս, օր-օր-օ՛ր, ջանի՛կ,  
Կուզեմ քեզ կյանքում տեսնել երջանի՛կ:

Քեզ ուսում կրտամ, բարձրագույն ուսում,  
Մեր դարը, որդի՛ս, դիպլոմ է ուզում.  
Դիպլոմը ծոցիդ՝ հինգ տասը տարից  
Հայրենիք կրգաս օտար աշխարհից,  
Կոկված ու փոխված, քեզ չե՛ն ճանաչի,  
Կասեն սա իսկի հայի նրմա՛ն չի...  
Տա՛ աստված, որդի՛ս, նրման չըլինես,  
Հայի անունը կե՛ղտ կրբերի քեզ...  
Օր-օր-օ՛ր, բալա՛ս, օր-օր-օ՛ր, ջանի՛կ,  
Կուզեմ քեզ կյանքում տեսնել երջանի՛կ:

Կյանքը թատրոն է... Ամեն մարդ պիտի  
Նախշած երեսով բեմ դուրս գա, որդի՛.  
Սաղ կյանքըդ խաղա՛, եղի՛ր դերասան  
Մի օր Ժան-Պիեռ, մի օր թուրք Հասան...  
Նեղի՛ր անգորին, պատվի՛ր ուժեղին,  
Միշտ դերեր փոխիր ժամի՛ն ու տեղի՛ն...  
Թե կին էլ ուզես՝ ծուռ քիթ ու բերան,  
Ամո՛թ չի, միայն մե՛ծ օժիտ վերան...  
Օր-օր-օ՛ր, բալա՛ս, օ՛ր-օ՛ր-օ՛ր, ջանի՛կ,  
Կուզեմ քեզ կյանքում տեսնել երջանի՛կ...